

玉牒初草卷一

宋劉克莊撰

寧宗皇帝 嘉定十一年

正月癸酉朔御大慶殿羣臣朝賀 辛巳填留守氏

距 壬午樞密院奏李全劉全楊友季先率先歸附

克復東海連水等處詔李全特補武翼大夫東京路

副總管楊友季先並修武郎京東路鈐轄 癸未吏

部引見某人等三十九人詔並改合入官 贈武信

軍節度使畢再遇太尉 賜故天章閣侍講胡瑗諡

曰文昭 乙酉臣僚奏今後有司議諡當博采是非

之實不可專據行狀從之 臨安府奏獄空詔獎之

己丑朝獻景靈宮 乙未右諫議大夫黃序奏納

諫用人等五箴 臣僚奏三衙江上諸軍并兩淮忠

義義勇民兵令主帥制置司郡守各嚴閱習之 丙

申雷 殿中侍御史李楠奏比來朝廷治賦吏失之

寬 上曰 孝宗治賦吏甚嚴賦吏害民豈可不治

丁酉吏部引見某等二十四人詔並改合入官

二月癸卯朔 甲辰禮部侍郎袁燮奏今日邊陲不

靖非朝廷有意用兵緣被其擾不得不應 上曰既

被侵犯若不能應何以為國 庚戌月入井 癸丑

復李壁元官與祠 甲寅大風 丙戌白虹貫日

丁巳進武翼大夫不嫖福州觀察使襲封嗣濮王

丙寅日有戴氣 臣僚奏朝士非休務日及公事聚

議不得出謁 黃序奏史館宜擇專官修帝紀餘官

分撰志傳遇史官闕不拘資格或補外許以稿隨修

畢上之詔從其議 三月壬申朔趙方奏知均州應

謙之因虜犯江棄郡入山賴統制馮杞捍禦始定詔

謙之降兩宮罷 庚寅詔今歲明堂惟事神儀物如

舊制其乘輿服御中外支費並從省約有司條具以聞 壬辰工部尚書兼國史寶錄院修撰任希夷等奏乞修 孝宗皇帝寶訓 丙申禮部員外郎李琪奏乞令太常寺將慶元元年以後典禮編纂成書 丁酉徐應龍等請讀通鑑徹卷乞宣付史館並從之 詔法有標撥為祖父俱亡而祖母與母有前晚嫡庶之分設今後應一母所出子孫及祖與父年老抱疾者並不得抑令標撥雖出祖父母與父母之命亦不許用州縣毋得給據從大理丞沈繹請也

四月壬寅朔 癸卯朝獻景靈宮 乙巳監察御史

盛宣奏洩米外國之弊乞下淮東漕司沿海州郡措置闕防犯者處以軍法又奏撫州歲起米綱守臣移易水腳之費抑進納富民部送乞下江西漕臣考核水腳錢出入之數今後輪差見任官從之 辛亥月

入太微垣 甲寅以禱晴舉行寬卹之政 己未以

經筵進讀資治通鑑終篇賜宰執講讀修注官燕於

秘書省 癸亥閣門舍人熊武輪對 上諭武曰卿

是東宮官太子如何武奏云殿下賢明仁孝勤儉節

用人之才否事之是非無不盡知每日講論之暇無
他嗜好手不釋卷且動如節度又不喜飲酒臣每輪
當宿直不聞宴飲之樂 上曰此天賦也 丁卯以
今年九月有事於明堂 戊辰黃序奏兩淮湖北京
西守倅之俸悉取銅會州縣小吏或折酸酒或以鐵
錢而又積壓不支乞悉委逐路運司下所部增小吏
俸將鐵錢並交子銅會作三色按月支給從之

五月辛未朔 丁丑以明堂有期告於天地宗廟社
稷宮觀 戊寅臣僚奏乞修義倉舊制歲終令丞合

一縣所入數上之守貳守貳合諸縣所入數上之常
平常平合一道數上之朝廷令丞替移必批印紙考
其盈虧議其殿最從之 壬午潼川路提刑兼提舉
丁必稱奏知資州李耆岡磐石縣令宇文之寅輒移
城外南津浮橋於西津竹木纖弱溺死十有四人乞
並罷黜從之 丙戌臣僚奏知天水軍黃炎孫倫生
誤事詔炎孫鑄二秩罷 壬辰 御射殿閱新舊行
門射藝有差 壬辰盛昱奏法科鋪陳斷案舊以五
十五通為十分以所通定分數以分數辨等級別恩

例凡七等止四等除評事餘三等循資占射比年偶
一中選不門等級皆可入寺有司以其仕進太優遂
難其題在下者病取放之數窄在上者患精通之士
少乞復七等之制上四等除評事餘三等初任注司
法經任除檢法取之寬則習者必衆用之精則濫者
不容從 甲午 詔前淮南轉運判官方信儒特鑄
三秩以給事中任希夷言其鼓倡儀真官民聽其奔
併私賂山東首領意在邀功故也 丙申大理寺丞

趙彥猷輪對乞擇守令 上曰守令難擇監司則每

路只消擇三兩人 丁酉命從臣日一人禱雨於天

竺山 戊戌黃序奏前知江陵府直秘閣趙善培昨
以憲節兼帥襄陽虜騎犯塞驚畏成疾易鎮江陵不
聞有一施設乃帶職名奉祠而歸詔善培落職

六月辛丑朔 癸卯盛章奏乞令諸路憲司歲終比

較州縣瘐死尤多者痛懲一二從之 乙巳臣僚奏

新知處州呂祖平頃以珍玩取媚權姦祖儉乃其堂

兄祖平恐為所累圖寫宗枝指為疏族用以自解守
江陰無善狀乞罷括蒼新命從之 丁未李安行奏

遴選愛民奉法者為郡守老成風力者為監司從之

袁燮進對奏蜀中不靖 上曰秋高馬肥是他時

月尤當為備燮奏云今日事勢迫切不容少緩 上

曰蜀帥不可不易又奏兩淮荆襄間近雖稍靜然不

可忽 上曰夷狄姦詐何可輕信燮奏云講和卻是

省事但虜人之意不專在歲幣難與通和 上曰他

鹵掠所得已數倍於歲幣燮奏云誠如聖諭虜既不

通和中國尤當嚴備 庚戌月入氏 辛亥填星留

守亢 乙卯有流星如太白 辛酉詔湖州振卹安

吉縣被水之民 丙寅錄行在繫囚

七月庚午朔日有食之 壬申右正言李安行奏

陛下雙隻皆視朝而延訪之時不及早晚皆講讀而
作輟之日不常聽納雖不倦而議論之見於施行者
無幾奉養雖有節而帑藏之耗於侵欺者不察豈非
安於小康而有怠心乘之耶願陛下謹終如始以興
治功從之 給事中任希夷繳奏成都路運判梁綸
輕信浮言驚擾中書舍人黃宜奏知天水軍黃炎孫
負印先遁 詔綸奪兩秩罷炎孫追三秩居於辰州

以集英殿修撰知平江府趙彥櫛為寶謨閣待制
旌其集事修舉也 甲戌監察御史蔡闢奏兵部侍

郎黃序徧厯臺諫嗜利無厭詔與祠祿監察御史王
夢龍奏國子司業林垌異懦貪鄙乞行黜罷從之

歲星入井 辛巳詔知漳州府許奕與祠提刑丁必

稱罷以侍御史李楠言其阜郊之擾妄奏失實故也

乙酉以袁燮為編類孝宗皇帝寶訓官 壬辰詔

進知泉州真德秀官一等旌其禽捕海寇之功也

丁酉詔諸以職罷毋得輕受文狀遽改正必檢會元

劾罪犯輕重為之處分從李楠請也 戊戌左司諫
盛宣奏乞戒飭監司帥守凡日前差入僉廳之人並
令回任違者御史臺覺受差人罷黜所差官吏責罰
從之

八月庚子朔 辛丑臣僚奏年來贓吏罰輕自今罷
免者勿予祠錫褫者勿敘復竄斥者勿近徙不與親
民者勿改正已甚則施杖配估籍之法乞下有司著
為令甲從之 癸卯權工部尚書胡槩奏事云殘虜
本無能為陛下憂兼南北初未有征伐意內因廷臣

橫議外而邊邀功使邊境久未安。上曰：皆邊吏希望爵賞為國生事，不可不戒。以右丞相兼樞密使史彌遠為明堂大禮使，參知政事鄭昭先為禮儀使，簽書樞密院事曾從龍為儀仗使，吏部尚書李大性為鹵簿使，戶部尚書薛極為橋道頓遞使。甲辰，以安德軍節度使師嵩提舉萬壽觀。詔平江府新甯嘉定縣分置五鄉，可易以依仁循義，服禮樂，知守信為名，從守臣所請也。丙午，歲星入井。臣僚奏新除起居舍人留元綱立朝傾險，治郡荒淫，乞寢新命。

詔與宮觀

壬戌寶謨閣待制新知興元府充利路

安撫使聶子述內引朝辭

上曰朕將付卿全蜀子

述奏臣材識凡下深懼無以稱塞

陛下使令之意

乙丑臣僚奏前知黃州謝汲古識淺行污乞寢召

命詔與宮觀

戊辰盛章李安行進對論敵情變詐

願陛下毋以虜退為可喜日與二三大臣講明備禦

上曰邊備不先理會卻遲安行奏兵法曰無恃其

其不來恃吾有以待之

上曰極是又臣僚奏二廣

大州城池甲兵僅足自保至於小州城低池淺兵或

不及百人南俗易動中州姦盜率多配隸於此猝有
竊發何以待之今世言武備者類於兩淮荆襄介意
而置嶺南於度外臣恐如唐人每備西北不知其禍
在於東南欲望朝廷不惜小費於二廣之間其有要
害去處葺浚城池練習民兵以備緩急從之

九月庚午朔 癸酉蔡闢奏今後聚斂之臣永不列
於親民刻剝之將永不使之馭軍從之 己卯朝獻

景靈宮 庚辰朝享太廟 辛巳大饗於明堂赦天

下 丙戌月入畢 戊子月入井 己丑歲星守井